

REGIONAL NEWS

CENTRAL YMA PRESIDENT

Central YMA President Pu Lalhmachhuana'n YMA member zawng zawngte leh Zohnahthlak unau zawng zawngte YMA Day Chibai bukin YMA chu pawl ropui tak leh thianghlim a nih ang ngeiin YMA-ah theihtawp chhuaha tan la thar leh turin YMA member zawng zawngte a chah.

Kumin YMA Day puala thuchah a sawiah CYMA President chuan, YMA chu Mizoram chhung chauh ni lo, India ram zau zawk pawh hriat a hlawh hle a ti a, Ram tana thil tha tih hi chhonzawm zel tur leh YMA ten lawmman beisei vang nilovin, ram leh hnam tan hma la zel turin a chah baw.

Pu Lalhmachhuana chuan YMA chu tlawmngai pawl pakhat mai ni lo hnam inngahna lungphum, Mizote phuarkhawmtu, a tul ang zela Ram leh Hnam tana ke pen thin a ni a ti a. Thlei bik a nei lova, a te ber atanga a lian ber thleng hian angkhat in YMA chuan a hrut rual vek a ti a, Mizoten YMA an nei chu an vanneih pui tih sawiin hnamdangin an awt hle a ti a, Tunlai thangthar zingah YMA hlutna hrefiah zo lo awm palh thei a ni tih sawiin a tul ang zel a inhrilhfiah a pawimawh tih a sawi baw.

Central YMA President chuan YMA chu a bul tantute atanga tun thlengin hma a la sawn zel a ti a, YMA member Nuai 5 an tling tawh tih sawiin Group YMA 50, Sub Headquarters 8 leh Branch 821 a awm ta chu a bul tantute, YMA hruaitute leh member, veng tin leh khaw tina tanlatute avang a ni, a ti a. YMA dinna leh inngahna, 'Tanpui ngaite tanpui' kawngah ke an pen zel tih sawiin Central YMA chuan Home/Centre leh Damdawiin hrang hrang bakah zoram pawna Mizo Welfare hrang hrang te ah an luangchhuak tih sawiin Sub-Hqrs YMA leh Group YMA te pawhin an mahni huamchhung ah theuh changhai leh tanpui ngaite tan an luang chhuak leh thei te chu YMA hlutna tizualtu a ni tih a sawi baw.

<><><>

MHIP

Mizo Hmeichhe Insuihkhawm Pawl (MHIP) chuan tunhnaia CBI ten an man Aizawl veng pakhat khawsa Lalrampana'n naupang kumtling lo khawihchhiaa mawi lo taka a khawsak pui bakah Internet hmanga a pholang chu an duhloh thu sawiin a phu tawh hremna pe ngei se an duh thu an sawi.

MHIP chuan nimin khan thuchhuah siamin Lalrampana khawsak dan chu an dem takzet tih an sawi a, Mizo hmeichhiate khawihchhiatna leh mipat hmeichhiate kawnga mualpho taka tarlan-na chu thleng tawh lo se an duh tih sawiin Lalrampana chu dan hnuaia a phu tawh hremna na tak dawng se an duh thu an sawi.

June ni 9 khan Central Bureau of Investigation (CBI) chuan mipat hmeichhiat lam hawia kumtling lo khuaikhemtu leh Child Sexual Abuse Material (CSAM) nei leh thehdarh thubuaiah Lalrampana hi an man a, CBI tarlan danin May ni 30 khan Lalrampana lakah hian thubuai ziah luh niin June ni 4-a a chenna in an dapna-ah electronic device an mansak a, Forensic endikna atangin thlalak leh video mawi lo tak awmna CSAM tam tham tak hmuhchhuah a ni a, an chhui chianna atangin Lalrampana hian CSAM siamna atan hian naupang hi a vau tih hriatchhuah a ni.

Thudawn danin CBI inrawlh hma hian he naupang leh a chhungte hian thuneitute lamah engmah an thlen lo a, CBI hian hma lain thubuai hi anmahni in an ziaak lut a ni.

<><><>

INTERNATIONAL DAY OF YOGA

Khawvel hmun dangte ang bawkin Mizoramah pawh hlawk thlak takin Yoga kalpui mek a ni a, a bik takin infiammite tan a tawngkai hle.

Akashvani zawhna chhangin, Mizoram Sports and Youth Services hnuaia Yoga Instructress Pi Lalhlimpuii Tochwawng chuan, Yoga chu infiammi te tan a tangkai tih a sawi a, infiammi mai bakah taksa hriselna atan mitin tan a pawimawh tih a sawi bawk.

Mizoram sorkar hnuaia infiamna huangah Yoga zirtirtu pakhat a awm a, ani hian Taekwondo, Volleyball leh Boxing ten coaching an kal zawh hnuaah Yoga a tih pui thin. Infiammi te bakah hian Damna In, Peace Home leh Observation Home-ah te Yoga hi a kalpui thin bawk a ni.

United Nations (UN) chuan kum 2014 khan khawvel puma hman turin International Day of Yoga hi a pawm a, June ni 21-ah hman thin niin, kuminah pawh hman a ni leh ang.

<><><>